

प्रादेशिक समाचार  
आकाशवाणी जयपुर-अजमेर

दिनांक 08.04.2024

समय: 18.45 बजे

000000

- प्रदेश मांय लोकसभा चुनाव रा दूजा दौर मांय 13 सीटां माथे नाम पाछा लेवण री मियाद पूरी व्ह्या पछे अब 152 उम्मीदवार चुनाव मैदान मांय ।
- लोकसभा चुनाव सारू राज्य मांय प्रचार जोर पकड़यो ।
- वायुसेना रा लड़ाकू जहाज सांचौर जिला मांय आपातकालीन हवाई पट्टी माथे अभ्यास कीनो ।
- राज्य मांय गर्मी रो असर तेज व्हयो-जोधपुर संभाग मांय केई ठोडां पारो 40 डिग्री सेल्सियस ने पार कीनो ।

0000

प्रदेश मांय लोकसभा चुनाव रा दूजा दौर रा तैत 13 सीटां माथे पडबा वाळा वोटं सारू उम्मीदवारां कानी ऊं नाम पाछा लेवण री मियाद खत्म व्हेवण पाछे अब 152 उम्मीदवार चुनाव मैदान मांय है । दूजा दौर रा चुनाव सारू 191 उम्मीदवारां रा पर्चा सही मिल्या हा, ज्यां मांय ऊं 39 उम्मीदवार नाम पाछा ले लीना । निर्वाचन विभाग री ओर ऊं जारी रपट रे मुजब दूजा दौर रा चुनाव मांय सब ऊं बत्ता 18 उम्मीदवार चित्तौड़गढ सीट माथे जदके सब ऊं कम सात उम्मीदवार झालावाड़-बारां सीट ऊं सियासी भाग आजमा रह्या है । जोधपुर अर कोटा मांय 15-15, अजमेर मांय 14, पाली मांय 13, जालौर मांय 12, टोंक-सवाईमाधोपुर अर बाडमेर मांय 11-11, राजमसंद अर भीलवाडा मांय 10-10 अर उदयपुर अर बांसवाड़ा मांय आठ-आठ उम्मीदवार चुनाव मैदान मांय है ।

00000

कांग्रेस पार्टी की ओर ऊं बांसवाड़ा लोकसभा सीट अर बागीदौरा विधानसभा उपचुनाव सारू भारत आदिवासी पार्टी सागे गठजोड़ रा ऐलाण पाछे ई आज पार्टी रा उम्मीदवार नाम पाछा लेवण री मियाद पूरी व्हेवण ताई नाम पाछा नी लीना । कांग्रेस री ओर ऊं नाम पाछो लेवण सारू वां रा उम्मीदवार अरविंद डामोर ऊं बात करण री कोशिश करी ज्यी, पण बात नी व्हे सकी । कांग्रेस पार्टी री ओर ऊं अरविंद डामोर रे खिलाफ अनुशासनात्मक कार्रवाई रा समाचार है । बागीदौरा विधानसभा सीट माथे उप-चुनाव सारू कांग्रेस रा उम्मीदवार कपूर सिंह ई नाम पाछो नी लीनो, ज्यी कारण तकनीकी तौर ऊं वा कांग्रेस रा उम्मीदवार रेहवेला ।

00000

लोकसभा चुणाव ने ध्यान राखता थकां राज्य मांय ई प्रचार लगातार जोर पकड़ पकड़ रह्यो है । मुख्यमंत्री भजन लाल शर्मा आज जैसलमेर मांय लोकसभा चुनाव ऊं जुड़ी बैठकसं लीनी अर प्रबुद्धजन सागे मीटिंग कीनी । कांग्रेस रा आला नेता अर राज्य रा पैली वाळा उपमुख्यमंत्री सचिन पायलट आज जयपुर ग्रामीण लोकसभा हलका रा जालसू मांय कांग्रेस रा उम्मीदवार अनिल चोपड़ा री हिमायत मांय राख्यी ज्यी चुनावी सभा ने संबोधित कीनी । वे कांग्रेस पार्टी कानी ऊं करी ज्यी कामां रा बारा मांय विगतवार बातचीत कीनी । पायलट नीमकाथाना जिला रा पाटन मांय इण्डिया गठबंधन रा उम्मीदवार सीपीआईएम रा अमराराम री हिमायत मांय जनसभा कीनी । वे झुन्झुनू जिला रा खेतड़ी मांय ई चुनावी सभा ने सम्बोधित कीनी । आवता दिनां स्टार प्रचारकां रा दौरा रा तैत भारतीय जनता पार्टी रा आला नेता अर प्रधानमंत्री नरेन्द्र मोदी रो 11 अर 12 अप्रैल ने प्रदेश रो दौरा करण रो कार्यक्रम है । वां रो 11 अप्रैल ने करौली मांय जनसभा करण, 12 अप्रैल ने बाडमेर मांय जनसभा करण अर दौसा मांय रोड़ शो करण रो कार्यक्रम है ।

00000

कांग्रेस रा प्रदेश अध्यक्ष गोविंद सिंह डोटासरा भारतीय जनता पार्टी माथे झूठ बोलण अर वायदा खिलाफी करण रा आरोप मांड्या है । वे आज जयपुर मांय खबरनवीसां सागे बातचीत कर रह्या हा । डोटासरा कांग्रेस कांग्रेस रा चुनाव घोषणा पत्र 'न्याय पत्र' मांय करी ज्यी वायदां रा बारा मांय विगतवार जाणकारी दीनी । वे इलेक्टोरल बॉड माथे सवाल उठाता थकां कह्यो के ई बारा मांय सुप्रीम कोर्ट री

टिप्पणी मायने राखे है। डोटासरा कह्यो के भाजपा री अंदरूनी सियासत रे कारण ईआरसीपी योजना राष्ट्रीय परियोजना नी बण सकी।

0000

प्रदेश मांय 19 अर 26 अप्रैल ने दो चरण मांय व्हेवण वाळा लोकसभा चुनाव मांय बत्ता ऊं बत्ता मतदातावां री भागीदारी तय करण रा मकसद ऊं भांत-भांत रा कार्यक्रम राख्या जा रह्या है। सवाईमाधोपुर रेलवे टेशन रा सगळा प्लेटफॉर्म अर इंतजार करण रा हॉल समेत खास-खास ठोडां वोट जरूर देवण रा संदेश अर अपील लगातार प्रसारित कर्या जा रह्या है। टेशन माथे खुद री फोटो लेवण रा सेल्फी प्वाइंट सागे टेशन मांय दाखिल व्हेवण रा अर बाहर निकळबा रा दरूजा माथे होर्डिंग अर पलेक्स लगा र वोट जरूर देवण रो संदेश दियो जा रह्यो है। डीग मांय ई स्वीप रा तहत वोट देवण सारू जाग जगावण बाबत न्यारा-न्यारा कार्यक्रम राख्या जा रह्या है।

-----

**पाली** रा जिला कलेक्ट्रेट परिसर मांय एलईडी स्क्रीन लगा र वोट देवण री प्रक्रिया रा बारा मांय वीडियो चला र जाणकारी दी जा रही है। **टोंक** जिला रा देवली मांय आज रन फोर वोट राखी ज्यी। **बारां** मांय मतदाता जागरूकता रथ ने हरी झंडी बता र रवाना करी ज्यो। इण रे मार्फत स्वीप दल रा सदस्य नुक्कड़ नाटक अर दूजा कार्यक्रमां रे जरिये वोट जरूर देवण री अपील कर रह्या है।

**श्रीगंगानगर** मांय मेहंदी मांडण री होड राखी ज्यी, जिण मांय महिलावां अर छात्रावां वोट जरूर देवण रो संदेश दीनो। **बूंदी** मांय मजूरां सारू मतदान जागृति संगोष्ठी राख र हर एक वोट रो महत्त्व बताता थकां प्रश्नोत्तरी कार्यक्रम रे जरिये वोट जरूर देवण री अपील करी ज्यी अर वोट जरूर देवण री सौगंध दिरायी ज्यी। **केकड़ी** मांय ई मतदाता जागरूकता सम्मेलन राखी ज्यो। **दौसा** लोकसभा हलका मांय लालसोट रा गांगल्यावास अर सिकराय हलकां मांय आंगनबाडी कार्यकर्ता सगळां ऊं वोट देवण री अपील कीनी।

0000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला।

-----

00000

आकाशवाणी जयपुर रा समाचार बुलेटिनां मांय चलायी जा रही राज्य मांय लोकसभा सीटां रा चुनावी जायजा री खास पेशकश मांय आज पेश है जयपुर संसदीय हलका री जाणकारी-  
जयपुर लोकसभा हलका मांय 19 अप्रैल ने वोट पडेला। ई कारण ई लोकसभा हलका मांय प्रचार रो काम जोर पकड लीनो है।

-----

00000

लोकसभा चुनाव री सारू प्रशासन ई पूरी तैयारी कर रह्यो है। पाली री संभागीय आयुक्त डॉ प्रतिभा सिंह आज सांचौर जिला री चितलवाना पंचायत समिति मांय डावल, सिवाड़ा अर रणोदर ग्राम पंचायतां मांय मतदान केंद्रां रो दौरा कर र व्यवस्थावां रो जायजो लीनो। वे बूथ लेवल अहलकारां ऊं मतदान केन्द्रां माथे बिजली, पाणी, छाया अर दिव्यांग मतदातावां सारू रैम्प री व्यवस्था समेत न्यारा-न्यारा सुबीता री जाणकारी ले र जरूरी व्यवस्था करण रा हुकम दीना। वे गुजरात री सरहद ऊं लागती गरडाली एसएसटी चैक पोस्ट रो दौरा ई कीनो अर जरूरी हुकम दीना।

00000

सांचौर जिला मांय नेशनल हाईवे नम्बर 925 ए माथे आगडावा अर सेसावा बीचे बणायी ज्यी आपातकालीन हवाई पट्टी माथे आज वायुसेना रा लड़ाकू जहाज अभ्यास कीनो। म्हाणा खबरनवीस

बतायो के सामरिक नजर ऊं खास आ हवाई पट्टी पाकिस्तान ऊं लाग्योडी सरहद ऊं महज 70 किलोमीटर दूर है।

-----

00000

आज झालावाड़ रो 187 वों स्थापना दिवस मणायो जा रह्यो है। आज ही रा दिन 186 साल पैली झाला जालिम सिंह कोटा रियासत ऊं न्यारा झालावाड़ राज्य री स्थापना कीनी ही। ई मौके जिला पर्यटन समिति री ओर ऊं विचार गोष्ठी राख्यी ज्यी, जिण मांय झालावाड़ मांय सैर-सपाटा रा हलका मांय बधती संभावनावां रा बारा मांय चर्चा करी ज्यी। लोकसभा चुनाव रे कारण लाग्योडी चुनाव आदर्श आचार संहिता रे कारण ई मौके कोई सरकारी कार्यक्रम नी राख्यी ज्यो।

00000

राज्य मांय गर्मी रो असर लगातार तेज व्हे रह्यो है। जोधपुर संभाग रा कुछ हलकां मांय ऊंचो ऊं ऊंचो तापमान 40 डिग्री सेल्सियस ऊं बत्तो दर्ज कर्यो जा रह्यो है। मौसम केंद्र जयपुर रे मुजब आवता 72 घंटां मांय अधिकतम तापमान मांय 2 ऊं 3 डिग्री सेल्सियस ताई री बधोतरी रा आसार है। ई दौरान जोधपुर अर बीकानेर संभाग मांय कठे-कठे पारो 42 डिग्री सेल्सियस ने पार कर जावण री संभावना ई है। मौसम केन्द्र रे मुजब काल ऊं राज्य रा ऊगणी अर लंकाऊ-ऊगणी हलकां मांय कठे-कठे बादळा री गाज सागे बिरखा व्हे सके है।

00000